

發燒 江秀鳳(四縣腔)

吾姆讀小學一年生個時節，戴到大山頂，有一擺寒著發燒，歸圓身焠燒，歸身仔手軟腳犁，頭那 xiad xiad 滾痛到會噉忒，軟怠怠仔，橫到眠床項。姐婆做事轉來，看著佢恁傷當，飯就無怕食，煞煞摻佢搯到背囊項，一路半行帶走，搯佢下山行石粒仔路又過河壩，行過燒燒仔個馬膠路，無鞋好著個姐婆，怕腳底痛到耐毋得，無怨嘆半息，淨緊講會到了！會到了！你再忍一下，毋好睡忒喔。

在姐婆個背囊項，昏喋喋仔，麼個就毋知，淨知姐婆個背囊汗流脈絡，透(dod)過吾姆心肝頭。姐婆搯等佢行忒點過鐘，正到三叉街項，先生(醫生)用手摸厥額頭會癩人，乜無罵姐婆，黏時就注射，又包幾包藥仔，摻姐婆吩咐講一日食三擺，食加兜仔滾水，這兩包係有再過發燒正食，係退燒仔就毋使食。等注射注忒，有較退燒了，正分佢兩子哀轉屋。

透當晝搵到下晝兩三點仔，兩子哀就食晝，姐婆牽等佢在街項個扁食店，喊兩碗大麵，吾姆該碗有加一粒卵，姐婆該碗無，阿姆講：做細人仔毋曉得想恁多，歡歡喜喜煞猛食。這係佢這生人，「新娘上轎——頭一擺」在扁食店食大麵，印象當深。

轉屋個時節，定定仔行，正知街項腳底個馬膠路燒到癩人還痛，過河壩個時節，石跳仔個石頭乜會癩人，蹶到伯公下，姐婆渡佢入去拜諾，承蒙伯公保底，這擺平安順序，順續借一杯神茶解渴，一路再過蹶上山頂愛轉屋下，阿姆實在行毋贏又毋敢講，姐婆係當靈通個人，知佢行毋贏仔，就跔下來搯佢，上崎个山路罅蹶又搯等佢，試著當敗勢，姐婆係佢人生肚項，頭一個先生，姐婆教吾姆做人愛有禮貌，堵著上家下屋個人愛曉得相借問，人客來愛斟茶分人食，做人愛篤實，毋好講花撩，乜做毋得搯人個壞話，細人仔有耳公無嘴，無若事情毋好多嘴，甘願分人梟乜毋好梟人，老古人講：「擎頭三尺有神明。」人做天看，天公伯毋會梟人，自家愛自重，別人就會信用你，係合意讀書就煞猛讀，讀加兜書下二擺大仔正毋使做耕種人絡無食又艱苦。

平時姐婆愛服侍阿大摻姐公，又愛畜 7 個細人仔「耕田合耕圃做到兩頭烏」，月光出來正轉夜，還愛順續去菜園挖兜番薯、割兜菜，哪有機會摻佢打嘴古，好得這擺發燒恁傷當，正有機會分姐婆搯，在恁遠个路項摻佢講恁多話，故所姐婆該央時摻佢講个話，逐句就記到心肝肚，一生人就篤篤仔做，做一個良善個人，拈人無愛做个事頭來做，毋使想愛賺大錢，愛做一個有用個人，對得起自家个良心，暗晡頭睡目就安心，承蒙姐婆在跋崎个山路教吾姆一生人用毋忒个智慧。

吾姆同厝講這隻古，緊講緊流目汁，厝續無法度想像，頭擺人赤腳躡踏艱苦个日仔算來仰般過个？

2018.4.26 在台中 55 路公車頂